



**REPUBLIKA E SHQIPËRISË**  
**KUVENDI**

**PROJEKTLIGJ**

Nr. \_\_\_\_/2016

**PËR DISA SHTESA DHE NDRYSHIME NË LIGJIN NR. 10465, DATE 29.09.2011 “PËR SHËRBIMIN VETERINAR NË REPUBLIKËN E SHQIPËRISË”, I NDRYSHUAR**

Në mbështetje të neneve 78, 83 pika 1, të Kushtetutës, me propozimin e Këshillit të Ministrave,

**K U V E N D I**

**I REPUBLIKËS SË SHQIPËRISË**

**V E N D O S I:**

Në ligjin nr. 10 465, datë 29.09.2011 “Për shërbimin veterinar në Republikën e Shqipërisë”, i ndryshuar”, bëhen shtesat dhe ndryshimet, si më poshtë:

**Neni 1**

Në nenin 1 pas pikës 11 shtohet pika 12, me këtë përmbajtje:

“12. Të përcaktojë rregullat për parandalimin dhe kontrollin e sëmundjeve të transmetueshme tek kafshët ose njerëzit duke bërë të mundur:

- a) klasifikimin sipas prioritetit dhe kategorizimin e sëmundjeve, si dhe përcaktimin e përgjegjësive për mbrojtjen e shëndetit të kafshëve;
- b) miratimin dhe regjistrimin e objekteve dhe mjeteve transportuese, garantimin e lëvizjes dhe gjurmueshmërisë së ngarkesave të kafshëve, produkteve embrionale dhe produkteve me origjinë shtazore, jo për konsum human.

c) hyrje daljen e kafshëve, produkteve embrionale dhe produkteve me origjinë shtazore, jo për konsum human në Shqipëri,

d) vendosjen e masave urgjente që duhen marrë në rast të shpërthimit të një sëmundje”.

## **Neni 2**

Në nenin 2 pas pikës 3 shtohet pika 4, me këtë përmbajtje:

4. Kafshët me pronar ose jo, kafshët e egra, produktet embrionale, produktet me origjinë shtazore jo për konsum human, subjektet, mjetet e transportit, pajisjet si dhe, si dhe çdo material i cili ndikon ose është i prirur të ndikojë në përhapjen e sëmundjeve të transmetueshme të kafshëve”.

## **Neni 3**

Në nenin 4 bëhen shtesat si më poshtë:

1. Pas pikës 8 shtohet pika 8/1, me këtë përmbajtje:

“8/1. “Biosiguri” është tërësia e masave menaxhuese dhe fizike të cilat kanë qëllim të reduktojnë rrezikun e hyrjes, zhvillimit ose përhapjes të sëmundjeve tek kafshët në fermë dhe/ose objekt, zonat ose çdo ambienti tjetër dhe mjetet e transportit”.

2. Pas pikës 20 shtohet pika 20/1 me këtë përmbajtje:

“20/1. “Hetim epidemiologjik” është zbulimi i origjinës së mundshme të një sëmundje të shfaqur në kafshë, me qëllim përcaktimin e shkaqeve dhe zhvillimin e mëtejshëm të sëmundjes në popullatën e kafshës së kontaminuar, duke realizuar kontrollin e pranisë dhe mënyrën e shpërndarjes së vektorëve të sëmundjes infektive, për vendosjen e strategjive të parandalimit dhe kontrollit të sëmundjes”.

3. Pas pikës 105 shtohet pika 105/1 me këtë përmbajtje:

“105/1. Sistemi i informacionit të epidemiologjisë veterinarë” është një sistem i bazuar në internet që ka komponent njoftimin e menjëhershëm të ngjarjeve epidemiologjike përkatëse në vend dhe në organizmat përkatëse ndërkombëtare si dhe survejancën, monitorimin dhe kontrollin e sëmundjeve menjëherë të lajmërueshme dhe të rëndësishme në vend”.

4. Pas pikës 106 shtohen pikat 106/1 dhe 106/2 me këtë përmbajtje:

106/1 “Stabiliment” është një objekt, ndërtesë ose strukturë në të cilën kryhet të paktën një nga aktivitetet e përmendura në këtë ligj”.

“106/2 Survejance” është mbledhja e vazhdueshme sistematike, shqyrtimi dhe analizimi i informacionit në lidhje me shëndetin e kafshëve dhe përhapja në kohë e informacionit më qëllim që të merren masat përkatëse”.

#### **Neni 4**

Në nenin 6 bëhen ndryshimet si më poshtë:

1. Pika 1 ndryshohet me këtë përmbajtje:

“1. Gjedhi, delet, dhitë, njëthundrakët dhe derrat i nënshtrohen identifikimit të detyrueshëm individual, në përputhje me rregulloren e miratuar nga ministri.

2. Pika 3 ndryshohet me këtë përmbajtje:

3. Për të parandaluar, zbuluar dhe kontrolluar sëmundje infektive, si dhe për të kontrolluar tregtinë e kafshëve, me propozim të autoritetit kompetent ministri urdhëron identifikim të detyrueshëm të llojeve të tjera të kafshëve”.

#### **Neni 5**

Neni 12 ndryshohet si më poshtë:

“Neni 12

##### **Identifikimi i kafshëve të shoqërimit**

1. Të gjitha kafshët e shoqërimit duhet t'i nënshtrohen procesit të identifikimit.

2. Të gjitha kafshët e shoqërimit të identifikuara duhet të regjistrohen në regjistrin që administrohet nga autoriteti kompetent.

3. Pronarët e kafshëve të shoqërimit mbulojnë koston e pasaportës mjekësore veterinarë dhe identifikimin e detyrueshëm të tyre (rripit identifikues ose mikroçipit).

4. Ministri miraton rregulloren përkatëse, ku përcaktohet forma e identifikimit të detyrueshëm, sipas pikës 1 të këtij neni.

5. Pronari i kafshës së shoqërimit është i detyruar që, brenda 14 ditëve, të njoftojë shërbimin veterinar për blerjen e një kafshe shoqërimi ose të kërkojë çregjistrimin e saj, në rastet e zhdukjes, shitjes, dhurimit ose ngordhjes së kafshës”.

#### **Neni 6**

Në nenin 14 pas pikës 2 shtohet pika 3 me këtë përmbajtje:

“3. Shërbimi veterinar kryen monitorimin e sëmundjeve që janë të listuara sipas pikës 1 të këtij neni në mënyrë që të zbulojë në kohë praninë e tyre. Kjo listë sëmundjesh plotësohet me

sëmundje e reja që shfaqen nëpërmjet mbledhjes, ruajtjes dhe analizimit të informacionit të vlefshëm në lidhje me situatën epidemiologjike”.

## **Neni 7**

Neni 15 ndryshohet me këtë përmbajtje:

### “Neni 15

#### Masat e përgjithshme profilaktike

1. Shërbimi veterinar, me qëllim zbatimin e masave të përgjithshme profilaktike për mbrojtjen e shëndetit, të kontrollit dhe të çrrënjosjes së sëmundjeve të kafshëve, kryen:

- a) ndarjen dhe izolimin e kafshëve të sëmura nga kafshët e shëndetshme;
- b) ndalimin ose kufizimin e vendosjes në tregje ose të lëvizjes së kafshëve;
- c) ndalimin e tregjeve të bagëtive, panairove të bagëtive, garat sportive dhe evenimente të tjera publike, ndalimin e punës në tregje, në transport dhe në vende të tjera të grumbullimit të kafshëve;
- ç) ndalimin ose kufizimin e tregtisë së kafshëve dhe të objekteve të tjera, përmes të cilave mund të transmetohet sëmundja;
- d) ndalimin e therjes së njëthundrakëve, dythundrakëve, shpendëve, lepujve dhe kafshëve të egra që gjenden në fermë;
- dh) ndalimin, kufizimin ose shtimin e gjuetisë, në përputhje me legjislacionin në fuqi të gjuetisë;
- e) eliminimin ose therjen e kafshëve të sëmura ose të kafshëve të dyshuara si të sëmura;
- ë) regjistrimin e kafshëve në një fermë ose vend tjetër ku ato mbarështohen dhe, nëse është e nevojshme, matrikullimin e veçantë të tyre;
- f) ndalimin ose kufizimin e prodhimit të kafshëve për një kohë të caktuar;
- g) trajtimin, mbrojtjen ose vaksinimin dhe testet diagnostike;
- gj) kufizimin e lëvizjes së personave në zonat mbrojtëse që janë në kontakt me kafshët e infektuara ose kafshët e dyshuara si të infektuara;

h) ndalimin e hyrjes ose të daljes së njerëzve dhe të kafshëve nga dhe drejt zonave të infektuara ose të rrezikuara, në të cilat dyshohet infeksioni;

j) ndalimin e riprodhimit të kafshëve deri në zhdukjen e infeksionit në zonat e infektuara;

k) eliminimin dhe asgjësimin e karkasave të qenve dhe maceve të rrugës;

ll) dezinfektimin, dezinfektimin dhe deratizimin e objekteve, pajisjeve, ndërtesave, mjeteve të transportit dhe të mjediseve të tjera, zonave dhe sipërfaqeve ku mbahen kafshët e infektuara ose të dyshuara si të infektuara;

m) dezinfektimin e personave, që kanë pasur kontakt, drejtpërdrejt ose tërthorazi, me vektorët e sëmundjeve infektive;

n) ndalimin e lëshimit të certifikatave veterinarë për lëvizjen e kafshëve dhe të materialeve me origjinë shtazore;

nj) kontrollin sistematik të kafshëve bartëse të sëmundjes;

o) sigurimin dhe mbajtjen e kushteve higjienike (biosiguria) në fermat e stabilimentet për mbarështimin e kafshëve dhe në mjetet e transportit;

p) kontrollin e detyruar për kafshët gjatë kullotjes ose ndalimin e kullotjes në zonat e infektuara, të rrezikuara ose të dyshuara si të infektuara.

q) masa shtesë të kontrollit të sëmundjeve nga ato të parashikuara në paragrafin e parë të këtij neni mund të merren nga Shërbimi Veterinar nëse shihen të nevojshme dhe të përshtatshme për të kontrolluar përhapjen e sëmundjes së listuar sipas pikës 1 të nenit 14 të këtij ligji, duke marrë parasysh:

i. rrethanat e veçanta epidemiologjike;

ii. llojin e fermave dhe stabilimenteve, vendndodhjet e tjera si dhe prodhimin në fjalë;

iii. llojet dhe kategoritë e kafshëve të përfshira;

iv. kushtet ekonomike ose sociale.

2. Masat shtesë të kontrollit të sëmundjeve miratohen me urdhër të Ministrit”.

## **Neni 8**

Në nenin 20 pika 3 ndryshohet, si më poshtë:

“3. Veterineri zyrtar merr kampionet dhe i dërgon në laboratorin veterinar, të përcaktuar për sëmundjen që dyshohet dhe lajmëron në sistemin e informacionit të epidemiologjisë veterinarë”.

## **Neni 9**

Pas nenit 20 shtohet neni 20/1 me këtë përmbajtje:

“Neni 20/1

### **Masat paraprake profilaktike**

1. Shërbimi veterinar në rast se dyshon mbi praninë e një sëmundje të listuar sipas pikës 1 të nenit 14 të këtij ligji, në pritje të rezultateve merr masat për kontrollin e sëmundjes, duke:

a) vendosur nën mbikëqyrjen zyrtare fermat dhe/ose stabilimentet, ose në çdo vendndodhje tjetër ku sëmundja dyshohet se është shfaqur ose ka origjinën;

b) mbajtur një regjistër të të gjithë kafshëve prezente në fermë, stabiliment, ose në çdo vendndodhje tjetër që ka rëndësi me përhapjen e mundshme të sëmundjes;

c) siguruar që janë marrë masat e nevojshme të biosigurisë me qëllim ndalimin e përhapjes së sëmundjes tek kafshët e tjera ose tek njerëzit;

d) vendosur në izolim kafshët e dyshuara si të prekura me qëllim ndalimin e përhapjes së sëmundjes;

e) kufizuar lëvizjet e kafshëve, të produkteve, personave, mjeteve të transportit si dhe çdo material ose pajisjeje tjetër me anë të cilës sëmundja mund të përhapet, me qëllim ndalimin e përhapjes së saj;

ë) ndërmarrë çdo masë tjetër të nevojshme për kontrollin e sëmundjes;

f) njoftuar në sistemin e informacionit të epidemiologjisë veterinarë dhe filluar hetimin epidemiologjik.

2. Shërbimi veterinar në vijim të rezultateve të hetimit epidemiologjik, rishqyrton masat paraprake profilaktike sipas pikës 1 të këtij neni”.

## **Neni 10**

Në nenin 21, pika 7 ndryshohet si më poshtë:

7. Ministri miraton rregulloret përkatëse për masat që duhet të zbatohen në fermën e vendosur nën mbikëqyrje zyrtare, sipas pikës 2 të këtij neni, për kontrollin dhe çrënjosjen e sëmundjeve sipas situatës”.

## **Neni 11**

Neni 48 ndryshohet me këtë përmbajtje:

“Neni 48

### **Masat e autoritetit kompetent**

Ministri me propozim të autoriteti kompetent, mbështetur në listën e sëmundjeve infektive, nxjerr urdhrin për marrjen e njërës prej masave të mëposhtme:

- a) eliminimin e kafshëve të sëmura, të dyshuara si të sëmura ose të ekspozuara kundrejt infeksionit;
- b) asgjësimin e kadavrave, produkteve të kafshëve, produkteve embrionale, të lëndëve të papërpunuara dhe të pajisjeve e mjeteve në një vatër të sëmundjes, që paraqet rrezik për shëndetin e kafshëve”.

## **Neni 12**

Në nenin 51 bëhen ndryshimet, si më poshtë:

1. Në pikën 1 bëhen këto ndryshime:

a) shkronja “f” ndryshohet me këtë përmbajtje:

“f) të zbatojnë kërkesat për mbrojtjen e shëndetit dhe mirëqenien e kafshëve si dhe të zbatojnë masat e biosigurisë”.

b. pas shkronjës “g” shtohet shkronja “h”, me këtë përmbajtje:

“h) Të marrë masat e përshtatshme të biosigurisë sipas:

i. llojeve dhe kategorive të kafshëve ;

ii. llojin e mbarështimit;

iii. rreziqet e mundshme duke përfshirë vendodhjen gjeografike dhe kushtet klimaterike si dhe rrethanat dhe praktikatat e zonës në fjalë.

2. Pas pikës 1 shtohet pika 1/1 me këtë përmbajtje:

“1/1.Ministri miraton rregullat mbi masat e biosigurisë që zbatohen në fermë”.

## **Neni 13**

Neni 54 ndryshohet me këtë përmbajtje:

“Neni 54

Funksionet e njesive te qeverisjes vendore

1. Strukturat përkatëse në njësitë e qeverisjes vendore duhet:

a) të bashkëpunojnë me autoritetin kompetent dhe strukturat e shërbimit veterinar rajonal për zbatimin e masave profilaktike, si dhe për kufizimin dhe çrrënjosjen e sëmundjeve infektive në kafshë;

b) të mbajnë nën kontroll dhe të zbatojnë kërkesat e këtij ligji për kontrollin e qenve dhe maceve të rrugës;

c) të përcaktojnë vendet e groposjes ose të grumbullimit të kadavrave të kafshëve dhe të bashkëpunojnë për eliminimin e tyre;

d) të marrin masa për rrethimin dhe ruajtjen e pikave të grumbullimit të mbetjeve dhe vendgroposjes së kadavrave si dhe të ndalojnë hyrjen e kafshëve atje”.

#### **Neni 14**

Neni 61 ndryshohet me këtë përmbajtje:

“Neni 61

Ekspozitat dhe panaiet

1. Subjektet që merren me organizmin e ekspozitave, kopshteve zoologjike shëtitëse, transportin e kafshëve që udhëtojnë me trupat e cirkut, me organizimin e panaiereve e të shitjeve të organizuara të kafshëve, jashtë mjediseve të stallave dhe stabilimenteve, njoftojnë paraprakisht, me shkrim, strukturat përkatëse në njësitë e qeverisjes vendore.

2. Strukturat përkatëse në njësitë e qeverisjes vendore miratojnë ose refuzojnë kërkesën për kryerjen e veprimtarive të parashikuara në këtë nen. Strukturat përkatëse të qeverisjes vendore njoftojnë shërbimin veterinar rajonal për vendin, datën dhe orën e zhvillimit të veprimtarisë.

3. Ministri miraton kërkesat dhe kriteret për miratimin ose refuzimin e kërkesës për kryerjen e veprimtarive, të parashikuara në këtë nen”.

#### **Neni 15**

Në nenin 62, pika 3 ndryshohet me këtë përmbajtje:

“3. Veterineri zyrtar urdhëron eliminimin e detyrueshëm në vend për kafshët me dëmtime të rënda dhe të pashërueshme dhe njofton strukturat përkatëse të njësisë të qeverisjes vendore”.

#### **Neni 16**

Pas nenit 64 shtohet neni 64/1, me këtë përmbajtje:

“Neni 64/1

Lëvizja e kafshëve të egra tokësore

1. Kafshët e egra lëvizin nga një vendbanim në Shqipëri në një vendbanim tjetër në Shqipëri, ose në një shtet tjetër, vetëm kur:



b) nuk vijnë nga një vendbanim në një zonë e cila është subjekt i kufizimeve të lëvizjes për shkak të një sëmundje të shfaqur që prek këtë specie të kafshëve;

c) kafshët e egra shoqërohen me një certifikatë shëndetësore ose dokumente të tjera veterinare të përcaktuara nga Autoriteti kompetent, dhe ku certifikimi i shëndetit të kafshëve është i nevojshëm për të siguruar përputhshmërinë me kërkesat e shëndetit të kafshëve për lëvizjet e parashikuara;

d) Autoriteti kompetent së bashku me autoritetin kompetent të destinacionit në rastin e një shteti tjetër, kanë rënë dakort për një lëvizje të tillë.

2. Çdo lëvizje e kafshëve të egra drejt Shqipërisë nga një shtet tjetër, duhet të përmbushë të gjitha kushtet e parashikuara në pikën 1 të këtij neni.

3. Rregullat e hollësishme për lëvizjen e kafshëve të egra brenda dhe jashtë territorit të Republikës së Shqipërisë miratohen me urdhër ministri”.

### **Neni 17**

Në nenin 85, pika 3 ndryshohet me këtë përmbajtje:

“3. Komisioni Shtetëror i PMV-ve njih dhe pranon vetëm certifikatën e tregimit për PMV-të, lëshuar nga Agjencia Evropiane e Medikamenteve (EMA) ose në një nga vendet e BE-së”.

### **Neni 18**

Pas nenit 86 shtohet neni 86/1 me këtë përmbajtje:

#### “Neni 86/1

#### Përfshirjet në përdorimin e PMV-ve në kafshë

1. Autoriteti Kompetent për përdorimin e PMV-ve, për parandalimin dhe kontrollin e sëmundjeve, bazohet në:

a) karakteristikat dhe profili i sëmundjes;

b) përhapjen e sëmundjes në Shqipëri, në vende fqinje nga ka ardhur sëmundja;

c) disponueshmërinë, efikasitetin dhe rreziqet që paraqesin këto PMV në mirëqenien e kafshëve;

d) disponueshmërinë e testeve diagnostikuese për të zbuluar infeksionet tek kafshët;

e) pasojat ekonomike, sociale dhe ndikimi mjedisor që sjell përdorimi i këtyre PMV-ve në krahasim me strategjitë e tjera për parandalimin dhe kontrollin e sëmundjeve.

2. Rregullat mbi përdorimin e PMV-ve sipas këtij neni, miratohen me urdhër Ministri.

3. Autoriteti kompetent merr masat e duhura për të mbrojtur shëndetin e kafshëve dhe shëndetin publik në lidhje me përdorimin e PMV-ve për studime shkencore ose për qëllime të zhvillimit dhe testimit të tyre në kushte të kontrolluara.”

### **Neni 19**

Neni 87 pika 1 ndryshohet me këtë përmbajtje:

“1. Shqyrtimi i dosjes së PMV-ve, miratimi nga Komisioni Shtetëror i PMV-ve të përcaktuara në nenin 85, pika 3 dhe lëshimi i certifikatës së tregtimit kryhen brenda një afati prej 100 ditësh nga data e dorëzimit të kërkesës dhe dosjes së plotë nga kërkuesi”.

### **Neni 20**

Në nenin 116 në pikën 1 bëhen ndryshimet dhe shtesat si më poshtë:

1. Pika 1 ndryshon me këtë përmbajtje:

“1. Veprimtaritë e mëposhtme mund të kryhen nga klinika veterinare me anë të një kontrate 1-vjeçare me drejtorinë e bujqësisë, të lidhur në bazë të procedurave në fuqi të prokurimit publik:

### **Neni 21**

Neni 117 ndryshon me këtë përmbajtje:

“Neni 117

Kontrata për delegimin e veprimtarive

Pas përfundimit të procedurës së prokurimit publik, në përputhje me dispozitat ligjore, kontrata për delegimin e veprimtarive nënshkruhet nga drejtorja e bujqësisë dhe titullari i klinikës veterinare. Kontrata përfshin dispozita të përcaktuara në aktet nënligjore.

### **Neni 22**

Në nenin 120 pika 1 ndryshon me këtë përmbajtje:

“1. Laboratorët veterinarë shtetërorë, të cilët kryejnë analizat laboratorike veterinare për kampionet e marra gjatë kontrolleve zyrtare, në përputhje me përcaktimet e këtij ligji, janë pjesë e rrjetit të shërbimit veterinar kombëtar dhe janë nën varësinë e Institutit të Sigurisë Ushqimore dhe Veterinarisë (ISUV)”**Neni 23**

Në nenin 122 pas pikës 3 shtohet pika 4, me këtë përmbajtje:

“4. Laboratorët, objektet dhe personat e tjerë fizike ose juridike të cilët përdorin agjentë patogjenë me qëllim kërkimin shkencor, edukimin, diagnostikimin ose prodhimin e vaksinave ose produkteve të tjera biologjike, përveçse të bazohen në standartet ndërkombëtare përkatëse, duhet:

a) të marrin masat në lidhje me biosigurinë dhe të izolimit biologjik me qëllim ndalimin e përhapjes së agjentëve patogjenë dhe kontaktin e tyre me kafshët, jashtë laboratorëve ose objekteve të tjera ku këto agjentë përdoren;

b) të kujdesen që lëvizja e këtyre agjenteve patogjenë, vaksinave dhe produkteve të tjera biologjike nga laboratorët dhe objekteve të tjera të mos shkaktojë rreziqe përhapjeje të sëmundjeve”.

#### **Neni 24**

Në nenin 128 pika 4 shfuqizohet.

#### **Neni 25**

Në nenin 129 pas shkronjës “h” shtohet shkronja “i” me këtë përmbajtje:

“i) bashkëpunon dhe lidh marrëveshje me Policinë e Shtetit me qëllim garantimin e zbatimit të këtij ligji ”.

#### **Neni 26**

Neni 130 ndryshohet si më poshtë:

“Neni 130

Fusha e veprimtarisë së veterinerit zyrtar

1. Veterineri zyrtar e ushtron veprimtarinë e tij në njësitë e mëposhtme:

- a) fermat e rritjes dhe mbarështimit të kafshëve;
- b) pikat e grumbullimit dhe pikat e pushimit të kafshëve;
- c) qendrat e karantinës shtetërore;
- ç) qendrat e riprodhimit dhe ndërzimit artificial;
- d) qendrat e grumbullim-përpunimit të produkteve me origjinë shtazore, jo për konsum njerëzor apo kafshë;

dh) njësitë e shërbimit veterinar privat, sipas përcaktimit të këtij ligji.

e) mjediset e thertoreve për kontrollin shëndetësor të kafshës para dhe pas therjes;

f) njësitë e shitjes së kafshëve të shoqërimit dhe zbukurimit;

g) njësitë e tregtisë së kafshëve, produkteve embrionale, produkteve mjeksore veterinare, nënprodukteve dhe produkteve me origjinë shtazore, jo për konsum njerëzor.

2. Ministri miraton formatet e listave të verifikimeve sipas fushave të veprimtarisë së veterinerit zyrtar.

### **Neni 27**

Në nenin 131 pas pikës 8 shtohen pikat 9, 10, 11, dhe 12 me këtë përmbajtje:

“9. Në mjediset e thertoreve kryen kontrollin veterinar të kafshës para dhe pas therjes, vulosjen e karkasave të mishit dhe lëshimin e çertifikatës veterinare, që shoqëron mishin dhe nënproduktet e kafshëve. Kriteret dhe kushtet e kontrollit veterinar në mjediset e thertoreve miratohen me urdhër Ministri.

10. Kryen kontrollin veterinar në tregjet e kafshëve të gjalla dhe kullota dhe në varësi të situatës epidemiologjike ndalon përdorimin e tyre.

11. Kontrollon njësitë e shitjes së kafshëve të shoqërimit dhe zbukurimit.

12. Mbikëqyr mbledhjen, grumbullimin dhe groposjen e kadavrave të kafshëve”.

### **Neni 28**

Në nenin 134, në pikën 1.3 shkronja “a” shtohet nënndarja “vi” me këtë përmbajtje:

“vi) vepron në kundërshtim me nenet 15 e 92 të këtij ligji.

### **Neni 29**

Nenin 137 ndryshohet si më poshtë:

“Neni 137

Licencimi, pezullimi dhe revokimi i veprimtarive

1. Veprimtaritë e kryera për qëllime të natyrës ekonomike, tregtare, profesionale dhe çdo natyre tjetër të ngjashme, përveç atyre të natyrës vetjake, që parashikohen në këtë ligj, licencohen dhe revokohen sipas kategorive e nënkategorive respektive të fushës II të shtojcës së ligjit nr. 10081, datë 23.2.2009 "Për licencat, autorizimet dhe lejet në Republikën e Shqipërisë", i ndryshuar”.

2. Veterineri zyrtar në rast se gjatë kontrollit konstaton se pas ndëshkimit për shkeljet e përcaktuara në nenin 15, 29, 30, 51, 83, 92, 94 dhe 96 nuk janë marrë masat korrigjuese brenda afatit të përcaktuar në procesverbalin e inspektimit i dërgon menjëherë autoritetit kompetent procesverbalin e inspektimit dhe propozimin për pezullimin e përkohshëm të aktivitetit të subjektit. Autoriteti kompetent brenda 30 ditëve nga data e njoftimit të procesverbalit të subjektit të inspektimit merr vendimin për pezullimin përkohësisht të aktivitetit.

3. Shërbimi veterinar rajonal në rast se gjatë kontrollit konstaton se subjekti brenda afatit të përcaktuar në aktin e pezullimit të veprimtarisë nuk ka marrë masat korrigjuese, i dërgon autoritetit kompetent procesverbalin e inspektimit së bashku me propozimin për revokimin e licencës. Autoriteti kompetent brenda 30 diteve nga data e marrjes së procesverbalit dhe propozimit për revokimin e licencës, i dërgon ministrit propozimin për revokimin e licensës së subjektit.

### **Neni 30**

#### **Hyrja në fuqi**

Ky ligj hyn në fuqi 15 ditë pas botimit në Fletoren Zyrtare.

**KRYETARI**

**ILIR META**